

Vatan yagonadir,
Vatan bittadir!

N:17 (67026)
2015-yil
27-aprel

www.tongyulduzi.uz

Gazeta 1929-yil 1-avgustdan chiqa boshlagan

O'zbekiston Respublikasi bolalar va o'smirlar gazetasi

ISSN - 2010-6092

Shukronalik



Musurmon ANORBOYEV va
Nafisa aya XOLBEKOVA
40 yil davomida Toshkent viloyatidagi
5-umumta'lim maktabida o'quvchilarga ta'lim-
tarbiya bergan fidoyi ustozlardan.

Favvoralar uchishar ko'kka,
Xotiralar kechar xayoldan.
Tinchlik muhrlanar yurakka,
Vatan nadir, degan savoldan.

Ayni paytda respublikamizdagi 9698 ta umumta'lim mak-
tabining barchasida chet tillar o'qitilmoqda. Xususan,
boshlang'ich sinflarda 94 foiz o'quvchilar ingliz, 3,5 foizi
nemis va 2,5 foizi fransuz tilini o'rganmoqda.



Toshkent viloyati, O'rta Chirchiq
tumanidagi 72-IDUM 6-iiA sinfi
o'quvchilari Sirojiddin ISMATULLAYEV
hamda Sevinch ABDUVAHOBOVA ingliz
tili fani bo'yicha eng a'tochi
o'quvchilardan.

HAYOTBAXSH

ZARRALAR QUVONCHI

Qadim-qadimdan
dono xalqimiz suvga o'zgacha
mehri bilan qaragan. Ariq, soy,
daryo bo'ylari obodonlashtirilib,
hordiq chiqarish uchun qulay
joylarga aylantirilgan.

Tabiatning noyob mo'jizasi bo'lgan suvning shifobaxsh obhayotligi dunyo olimlari tomo-
nidan ko'p bor e'tirof etilgan. Mamlakatimizda 1-may - Favvoralar sayli yoshlar ommaviy-
madaniy bayrami sifatida belgilanishi ko'pchilikning dilidagi ayni muddao bo'ldi. Ushbu
kunda keng maydonlar, muhtasham binolar oldidagi rang-barang favvoralar atrofi yanada
gavjum bo'ladi. Buvasi yoki buvisining qo'lidan ushlab olgan, musiqiy favvora ohangidan
zavqi ichiga sig'mayotgan bolajonlar shodligiga qiyos topilmasa kerak.

BOBOM QUYOSHGA O'XSHAR

Erta tongda ko'kka ko'tarilayotgan quyoshni tomosha qilganmisiz? Saxiy quyosh avvaliga tog'lar cho'qqisini, so'ngra qir-u dalalarni, undan so'ng bog'-u rog'larni nurga to'ldiradi.



Men bobomni quyoshga o'xshataman. Mehri cheksiz u zotning dargohiga borganimda, qo'llarida ketmon yoki tokqaychi ko'raman. Tomorqa yumushlari bilan doim band bo'ladigan bobojonimning pand-nasihatlariga amal qilaman.

– Biz qiyinchilikda o'sdik, siz aslo bunday kunlarni ko'rman, hamisha baxtli bo'linglar, – deyдилar.

Bobomning boshlaridan kechirgan kunlarini eshitganimda, xuddi ertakdek tuyuladi. – Esimni taniganimdan dalada mehnat qilganman, bizning suyakimiz mehnatda qotgan. Bolaligimda suvni buloqdan tashirdik, yozda chang, qishda loy bo'ladigan ko'chalardan maktabga qatnardik, – deyдилar. Men har safar ularnikiga otlanganimda, maktabdagi a'lo baholarim, jamoat ishlarida faol qatnashganim uchun berilgan faxriy yorliqlarimni o'zim bilan olaman. Ularni bobojonimga ko'rsatib, yaxshi o'qiyotganimni, sinfimizda a'lochi qiz ekanligimni aytaman. Sakson yoshni qarshilab borayotgan bobojonim va mehribon buvijonimning yonlariga talpinaman. Ularni negadir sog'inib qolaveraman.

Odina SAHOBIDDIN qizi,
Yunusobod tumanidagi 96-umumta'lim maktabining 8-«A» sinf o'quvchisi

Yaqinda Uchtepa tumanidagi 296-umumta'lim maktabida ma'rifat homiysi, ilm-fan, adabiyot va san'at, madaniyat rah-namosi, sarkarda, temuriylar davlatiga asos solgan Amir Temur hayoti va faoliyatiga bag'ishlangan «Buyuk bobomiz» mavzusida qiziqarli tadbir bo'tib o'tdi.

Sohibqiron hayotiga oid sahna ko'rinishi kuy va qo'shiqlarga ulanib ketdi.

O'quvchilardan Zufar Zokirov, Shahzoda Uchqunxonova, Bobur Maqsudxo'jayev, Saodat G'ofurova, Madina Abdupattohova, Malohat Valixonova, Kamola G'ofurova, Zarnigor Aminjonova hamda Muhammadamin No'monov tadbirda faol ishtirok etishdi. Shoira Oygul Ubaydulla qizi, ustozlardan Said Nizomova va Surayyo Qodirovalar Amir Temurning ibratli hayoti xususida so'zlab berishdi.

Kimki senga do'stlik qilsa, unutm, unga muruvvat qil, ehson, izzat-ikrom ko'rsat, deya saboq bergan buyuk va suyuqli inson avlodi ekanligimiz qalbmizda iftixor uyg'otadi. Bobomizning o'gillariga doimo amal qilib, ajdodlarga munosib voris bo'lishga harakat qilamiz.

Dilbar PRIMOVA,
poytaxtimizning Uchtepa tumanidagi 296-umumta'lim maktabining 7-«A» sinf o'quvchisi

Hayotning past-u balandini ko'rgan, achchiq-chuchugini totgan, ayniqsa, dahshatli urushning azob-uqubatlarini o'z boshidan kechirgan keksa avlod vakillari – nuroniylarimizga har qancha e'zoz-ehtirom ko'rsatsak, arziydi.

Tabarruk ONAXON



Shahrimizning Yunusobod tumanidagi Oqtepa mahallasida yashovchi mehnat fronti faxriysi, 90 yoshni qarshilayotgan Huvaydo aya mahallamizning izzat-hurmatiga loyiq tabarruk onaxonlardan sanaladi.

Otadan 14 yoshida ajragan oiladagi bosh farzand zimmasiga ro'zg'or yuki tushadi. Jamoa xo'jaligida ishlab, onasi ibodat ayaga yordam bera boshlaydi. Huvaydoxonning taqdiri 1941–1945-yillarda jangdan yorug' yuz bilan qaytgan Said Rasulov bilan bog'lanadi. Ahillik, halollik ustun bo'lgan bu oiladagi 9 farzand, 30 nevara, 40 chevara hamisha ayangin atrofida parvona. Ota-onalaridan mehnat har qanday sharoitda ham insonni ulug'lashini tushunib yetgan farzandlar hozirgi kunda turli sohalarida yurt ravnaqi uchun o'z hissalarini qo'shib kelmoqdalar. Bugungi kunda «Shuhrat» medali sohibasi Huvaydo aya davralarning to'rida qo'llarini duoga ochib, yoshlarga nurlil kunlar osonlik bilan qo'lga kiritilmaganini aytib, unga shukrona keltirish kerakligini uqtirishdan tolmaydi.

Yonimizda, atrofimizda ana shunday duogo'y nuroniylarimiz bor ekan, yurtimiz yanada gullab-yashnayveradi.

Gulchehra KARIMOVA,
Respublika «Nuroniylar» jamg'armasi huzuridagi «Faxriylar va yoshlar bilan ishlash guruhi» a'zosi

Buyuklar avlodimiz



7-«A»DAN 6 TA MAKTUB

Tahririyatimizga kelgan maktublarni saralar ekanmiz, olislardan bo'lsa-da, o'quvchilarning gazetamizga bo'lgan mehrini tuyib turamiz. Bu safar bizga Samarqand viloyati, Pasdarg'om tumanidagi 24-umumta'lim maktabining 7-«A» sinfidagi tahsil olayotgan o'quvchilardan bir vaqtning o'zida 6 ta maktub keldi. Shu sinf o'quvchisi Faxriddin NURMO'MINOV o'qigan ertaklari asosida rasm chizgan bo'lsa, ayrimlari ijod namunalari-yu kelgusidagi orzu-umidlari bilan o'rtoqlashishibdi.

PAZANDA QIZLARMIZ

Men va sinfdoshlarim «Tong yulduzi» gazetasidan o'zimni qiziqtirgan barcha mavzularni topamiz: pazandalikka qiziqqanlar gazetaning har bir sonida yangi retseptlar bilan tanishishsa, chet tilga ishtiyiq borlar ingliz tilidan maktabda olgan bilimlarini mustahkamlashmoqda. Topishmog'-u boshqotirmalarni aytmaymizmi?! Ularning har birini maroq bilan yechamiz.

Soliha OMONOVA,
Farzona SULTONMURODOVA,
Mahfuza ABDUXALILOVA

ORZULARIM BIR OLAM

Men kelgusida dadamga o'xshab haydovchi bo'lishni istayman. Buning uchun bor mahoratimni sarflashga tayyorman. Maktabni bitirgach, kollejda tahsil olib, bilimimni yanada mustahkamlayman. Barcha ustozlarimdan minnatdorman. Bizga bilim berib, kelgusida komil inson bo'lib voyaga yetishimizda ularning hissasi katta.

Dovudbek AXTAMOV

E'TIBOR SABAB...

Bir kuni Javohir tanaffus paytida dars tayyorlab o'tirgan edi. Sho'xroq sinfdoshi unga xalaqit qilib, jig'iga tegdi. Shunda Javohir:

– Mening fikrimni chalg'itma, undan ko'ra, kel, birga dars tayyorlaymiz, do'stim, – dedi mehr bilan. Bu gapdan do'sti uyalib ketdi va daftar-kitobini olib kelib, Javohir bilan birga dars tayyorlay boshladi.

Qissadan hissa shuki, har bir bolani yo'lga solsa bo'ladi, buning uchun birozgina e'tibor bo'lsa, bas.

Firdavs QARSHIYEV

BUXORO VILOYATI, G'JDUVON TUMANIDAGI 43-UMUMTA'LIM MAKTABI SHOGIRDLARGA QANOT BAXSH ETIB...

Ziyoda TESHAYEVA, maktab direktori:

– Bugungi kunda muassasamizda 678 o'quvchiga 54 nafar fidoyi o'qituvchilar ta'lim-tarbiya beradi. Maktabda ijodiy, fan va sport to'garaklari faoliyat yuritmoqda. Fan xonalari zamonaviy talablar darajasida jihozlangan, audio, multimedia resurslari bilan ta'minlangan. O'qituvchilarimiz saboq jarayonida «Dars muqaddas», «O'rgan – o'rgat», «Yaxshi muallim – sifatli ta'lim» kabi tavsiyalarga qat'iy amal qilishadi. O'quvchilarimiz juda faol, ular «Kamalak bilimdonlari» tanlovi viloyat bosqichida hamda futbol musobaqasida viloyatda 2-o'rin, «Bilimlar bellashuvi»da ham yuqori natijalarni qo'lga kiritishdi.

Maktabda «Fan oylilari», «Ochiq darslar festivali» qiziqarli tarzda o'tkaziladi. O'qituvchilardan Gulshod

Gadoyeva, Tursunoy Hasanova, Zebo Kattayeva, Dilafroz Muhammedova, Feruza va Aziza Bo'ronova, Olim Ne'matov, Gulchehra Salimova, Mahbuba Temirova, Gulnoz Rajabova, Komila Samadova va interfaol, innovatsion texnologiyalardan foydalanib, darslarni puxta va zamon talablariga mos holda olib bormoqdalar. Maktab kutubxonasi doimo o'quvchilar bilan gavjum.

Ishonamanki, bizning o'quvchilar kelgusida Vatanimiz kelajagini yanada yuksaltirishga o'zlarining munosib hissasini qo'shishadi.



SHIFOKOR BO'LMOQCHIMAN!

Ota-onam, qishloqdoshlarim salomatligi yo'lida xizmat qilishni istayman. Maqsadimga yetishish uchun barcha fanlarni a'loqa o'zlashtirishim kerakligini bilaman. Shuning uchun orzuim amalga oshishida tinmay izlanaman.

Risolat OLIMJONOVA

BIZ «YOSH TABIATSHUNOSLAR» DANMIZ

Maktabimizda «Yosh tabiatshunoslar» to'garagi faoliyat yuritadi. O'quvchilar va ustozlar hamkorligida har yili an'anaviy tarzda o'tkazib kelinayotgan «Ko'chat o'tqazaylik» tadbiri bois, bugun maskanda qariyb 200 tup archa hamda o'rik, yuzlab manzarali daraxtlar, 50 tupdan ortiq atirgul o'tqazilib, parvarishlanmoqda. Turfa xildagi gullar yashnab turgan gulzorimizga hamma havas qiladi. Bir qarich yer ham e'tibordan chetda emas. Jonli burchagimizda esa quyon, tovuq, toshbaqa va sayroqi qushlar bor. Agar maktabimizga kelsangiz, tabiatning go'zal, mo'jaz manzarasidan siz ham bahramand bo'lasiz.

Sardor RAMAZONOV



YURTIMIZ POSBONLARI

Sizlar borki, biz tinchmiz, Yurtimiz posbonlari. Postda hushyor turishar, Mard, jasur o'g'lonlari.

Momolar duo qilar, Sizlarga umr tilar. Boshingiz Humo silar, Vatanim qalqonlari.

Hanifa SHAMSIYEVA, 3-«A» sinf o'quvchisi

SIZ BORSIZ, QADDIM BALAND!

Tunlari alla aytgan, Siz mening mehribonim. Tinmay ertaklar aytgan, O'zingiz jonajonim.

Ko'zingizga qarasam, Nur yog'ilar doim. So'zlaringiz ehsitam, Ko'zimda yashnar dunyo.

Siz borsizki, onajon, Hayot bermas menga pand. Siz borsizki, onajon, Boshim tik, qaddim baland.

Munisa IMOMOVA, 4-«V» sinf o'quvchisi

ORZULARIM QANOTI

Maktabda xushxabar tarqaldi. Uni eshitishim bilanoq, «Kitobim, jon kitobim, qalbidagi oftobim, bo'l ertam saodati, orzularim qanoti», deya maktab kutubxonasi tomon oshiqdim. Kutubxonamizga 460 dan ziyod yangi turdagi kitoblar kelibdi. Ular orasida sevimli shoir va yozuvchilarimiz Zulfiya, Po'lat Mo'min, Said Ahmad, Xudoyberdi To'xtaboyev, O'tkir Hoshimov, Anvar Obidjon asarlari borligini ko'rib, sevindim.

Nodirabegim BAXTIYOROVA

O'quvchilarimiz fikrlari bilan tanishish



A. NE'MATOV, boshlang'ich sinflar bo'yicha direktor o'rinbosari:

– Maktabda tashkillashtirilgan tadbirlarda faol ishtirok etgan o'quvchilar hamisha rag'batlantiriladi.

SIZGA

TASHAKKUR, USTOZI!

Bizning sinfda deyarli barcha ijodkor. Shunday ekan, buning boisi nimada, deb o'ylashingiz aniq. Bu bizning sevimli, kamtar, ammo o'ta talabchan ustozimiz Tursunoy Hasanova sabab, deb bilaman. Hatto yuqori sinf o'quvchilari ham ijodiy ishlarini, avvalo, ularga ko'rsatishadi. Mana, so'nggi qo'ng'iroq ham yaqinlashib kelyapti. Biz esa boshlang'ich sinfini tugatamiz. Ustoz, siz bilan sira xayrlashgimiz kelmaydi. Siz onamiz kabi mehribonsiz. Baxtimizga doimo sog' bo'ling!

Hurmatoy IZZATOVA

GULCHIROYNING IBRATI

5-«D» sinf o'quvchisi Gulchiroy Jabborova haqida gap ketganda, «Kamalak» sardorlaridan biri, «Kamalak bilimdonlari–2015» tanlovining viloyat bosqichida maktab jamoasi 2-o'rinni egallashida hisssasi kattaligini alohida ta'kidlaydi.



Men «Yosh matematiklar» to'garagi a'zosiman. Dastlab, bu fan menga qiyin tuyulardi. Ammo Ibn Sinoning «Toshni kesgan arqon» rivoyati menga qattiq ta'sir qildi. O'zimdagi qat'iylik sezdim. Mana, to'rt yildirki, «Eng zo'r hisobchi» tanlovida maktabdoshlarim orasida birinchilikni qo'ldan bermayapman.

Yaqinda sinfdoshlarim o'rtasida kichik olimpiadada ham 1-o'rinni egallab, tanlovning tuman bosqichiga yo'llanma oldim. Bu gal ham yetakchi o'rinni egallash uchun astoydil harakat qilmoqdaman.

Azimjon TEMIROV

Sahifani F. ADILOVA, A. KARIMOV, N. QIDIRALIYEV, Z. MAMATQULOVA tayyorlashdi

Xalqimiz ma'naviyatini yuksaltirishda adabiyotning o'rnini beqiyos. Yillar davomida yaratilgan boy ma'naviy merosimizni o'rganish, uni targ'ib etish bugungi kunning muhim vazifalaridan biridir.

Hayot sabog'i



Yaqinda poytaxtimizning Olmazor tumanidagi 28-umumta'lim maktabida o'tkazilgan adabiy-badiiy kecha «Adabiyotga oshufta dillar», deb nomlandi.

Kechada shoira Muhtarama Ulug'ova, Zulfiya nomidagi Davlat mukofoti sovrindorlari Dilbar Siddiqova va Robiya Ro'ziyeva, tuman XTMFMT va TE uslubchisi Maryamjon Matyoqubova shoira Zulfiyaning o'zbek adabiyotida tutgan o'rnini, adibaning hayot saboqlari haqida to'xtalib o'tishdi.

– Zulfiya opa men, men kabi adabiyot ixlosmandlarining eng yaqin maslahatchisi edi, – deb hikoya qiladi u bilan «Saodat» jurnalida uzoq yillar birga ishlagan Muhtarama opa. – Ustozimda o'rnak olsa arziguulik fazilatlar ko'p edi. Qanchadan qancha qo'shiq va afsona, doston va ertaklarni yoddan biladigan onaning hikoyalari jajji qizaloqqa benihoya huzur bag'ishlaganini sog'inib eslar edi. Doimo adabiy tilda so'zlardi. Rus tilini mukammal bilgani bois, tarjimonlarga so'zlarning rus tilidagi ma'nosini ko'pincha o'zi topib berardi. Lutfiy, Navoiy, Shekspir, Pushkin va Nekrasovlar ijodiga

alohida mehr qo'ygandi. Ochig'ini aytsam, o'zbek qizlariga xos kiyinish, muomala madaniyati, o'z ustida ishlashni Zulfiya opadan o'rganganman.

Shuningdek, tadbirda maktab o'quvchilaridan Soliha Abdurazzoqova, Robiya Hikmatullayeva ijodlaridan namunalar o'qib berishdi. Vasila Inog'omova, Nasrulla To'rayev, Dilfura Ismoilova ishtirokidagi mushoira hamda 7-sinf o'quvchilari tomonidan teatrlashtirilgan sahna namoyishi ishtirokchilarda katta qiziqish uyg'otdi.

Zero, yosh va izlanuvchan o'qituvchilar Xumora Rahmatullayeva, Oydin Navro'zova hamda Ziyoda Qosimovalar tashkillashtirgan kechadan maqsad, ustoz Mirtemir ta'biri bilan aytganda, o'ta kamtar, zahmatkash, bilim ufqi keng, doimo dili toshqin, olamni timsollar ko'zguisida tasavvur etishga qodir yetuk shoira ijodini puxta o'rganib, uning tabiatidagi jihatlarni kashf etib borishdir.

Nodira NAZAROVA



G'ILJAKCHI MAHORATI

Mashurbek Ubaydullayev Andijon shahridagi 7-maxsus musiqa maktab-internatining 8-«B» sinf o'quvchisi. U hozirda Alijon Qodirov rahbarligida g'ijak mutaxassisligi sinfidagi dars oladi. O'ziga xos iqtidorga ega bo'lgan Mashurbek bir qancha viloyat va respublika ko'rik-tanlovlari faol ishtirokchisi.

Yaqinda yosh sozanda Rossiyaning Sankt-Peterburg shahrida bo'lib o'tgan «Yevropaga yo'l» xalqaro festivalida ishtirok etib, 3-darajali diplom bilan taqdirlandi.

Ko'rik-tanlovlarda qatnashish Mashurbekning ijrochilik mahoratini oshiribgina qolmay, qardosh xalqlarning san'ati bilan yaqindan tanishish imkoniyatini beradi.

Sardorbek INOMIDDINOV



Vatan uchun yaratilgan qo'shiq

Marjona akasi Shahriyor bilan kuylagan «O'zbekiston» deb nomlangan qo'shiq'i boshlang'ich sinflari o'rtasida Chilonzor tumani bo'yicha o'tkazilgan «Eng yaxshi jozibador kuy va maftunkor raqs» ko'rik-tanlovida «Eng yaxshi qo'shiq» nominatsiyasi g'olibi bo'ldi.

Poytaxtimizdagi 79-umumta'lim maktabining 2-«V» sinf o'quvchisi Marjona Akbaraliyeva go'zallikka oshno o'quvchilardan.

U badiiy gimnastikaning nozik sirlarini o'rganish bilan bir qatorda, tumandagi 12-Madaniyat va istirohat markazida tashkil etilgan raqs to'garagining a'zosi. Murabbiysi Valentina Linskayadan «Xorazmcha», «Andijon polkasi», «Bolaligim», «O'zbekistonim» kabi milliy hamda qardosh xalqlar raqslarini qunt bilan o'rganyapti.

Marjona akasi Shahriyor bilan birgalikda «Chuppy», «Kango»

reklamalarida, xonanda Ulug'bek Rahmatullayevning «Chaqaloqlar», A. Imyaminovning «Adashdim», xonandalar «Farhod va Shirin» guruhi xonandalarining «Ota uyning ostonasi», Sardor Rahimxonning «Qushcha» qo'shiqlariga olingan kliplarda muvaffaqiyatli suratga tushishga ham ulgurdi.

Marjonaning ko'plab qo'shiqlariga otasi – Toshkent pedagogika kollejining Musiqa kafedrasida katta o'qituvchisi, bastakor Baxtiyor aka Sobirov kuy bastalagan. Baxtiyor aka farzandlari bilan kollej jamoasi tadbirlarida ham muntazam ishtirok etib kelishadi.

Maktabda a'lo baholarga o'qish, tirishqoqlik, intizom, xushchaqchaqlik, dadillik, intiluvchanlik Marjonaga doimo kuch bag'ishlaydi. Yangidan yangi muvaffaqiyatlar sari chorlaydi. Yosh iste'doddagi go'zallikka oshnolik vaqtlar kelib, albatta, o'z mevasini berishiga ishonamiz.

Dilbar MAXAMEDOVA,
Toshkent pedagogika kolleji o'qituvchisi,
Nodira YORMAT qizi



KITOBXONLAR TANLOVI

Toshkent shahar, Olmazor tumani xalq ta'limi muassasalari faoliyatini metodik ta'minlash va tashkil etish bo'limi tasarrufidagi 249-umumta'lim maktabi qoshidagi Axborot resurs markazida «Eng yaxshi kitobxon o'quvchi» tanlovi o'tkazildi.



Tuman miqyosidagi bu tanlovdan maqsad o'quvchilarga milliy va jahon adabiyoti, ilmiy ommabop qo'llanmalarni tizimli targ'ib qilish orqali ularda vatanparvarlik, ezgulik, insonparvarlik singari yuksak insoniy fazilatlariga nisbatan mehr va muhabbat uyg'otish hamda axborot olish madaniyatini shakllantirishdan iboratdir.

Tanlovning maktab bosqichida oliy o'rin 28-umumta'lim maktabiga, 1-o'rin 278- va 298-umumta'lim maktablariga berildi. 2-o'rin 11-, 261-umumta'lim maktablari, uchinchi o'rin 326-umumta'lim maktabi o'quvchilari qo'lga kiritishdi. Qolgan maktablar ham faxrli o'rinlarga sazovor bo'lishdi.

Anjuman davomida «Men, ota-onam, bobom-buvim – kitobxon oila» maktablararo tanlovi ham o'tkazildi. Unda o'quvchilar va oila a'zolari faol qatnashib, oliy o'rinni 133-umumta'lim maktabi, 1-o'rinni 224-umumta'lim maktabi, 2-o'rinni 22-umumta'lim maktabi, 3-o'rinni 119-umumta'lim maktabi vakillari qo'lga kiritishdi. Mutasaddilar va maktab ma'muriyati tomonidan faol o'quvchilar va ularning oila a'zolariga tashakkurnoma va esdalik sovg'alar topshirildi.

Muzaffar AHMEDOV

Lesson 33



BABUR'S HOUSE MUSEUM
(Bobur uy-muzeyi)

Babur's house museum – is situated in Andijan city, where Zahiriddin Muhammad Babur lived and studied in Ark-Ichi, the town's citadel that exists no more. The museum opened in 1989 on the site of his residence, in celebration of the 460th year of publication of his autobiography entitled Baburname, published in English as the Memoirs of Babur.

DETERMINE THE TENSE
(Zamoni aniqlang)

Read the following sentences and define their tenses.

Teacher is writing to the blackboard. *Present Continuous*
Pupils are looking at the blackboard now.

We watched the film with our neighbors yesterday evening. _____

Saida runs every morning. _____

Jamol went to his grandfather last week. _____



Umida UMAROVA

QUESTIONS ABOUT COLORS
(Ranglar haqida savollar)

1. What color are Adolat's overalls? _____
2. Are Tohir's shorts grey? _____
3. _____? Lola's dress is orange.
4. Who has got black hair? _____
5. _____? Shahnoza's dress is purple.
6. _____? No, his T-shirt is yellow.
7. _____? Eldor has.
8. What color are Jamshid's shorts? _____
9. Is Nigora's dress orange? _____
10. Who has white socks? _____
11. _____? It is light blue.
12. What color are Lobar's shoes? _____



Inobat QUDRATOVA,

Buxoro viloyati, G'ijduvon tumanidagi
51-umumta'lim maktabining ingliz tili o'qituvchisi

UNDERLINE THE CORRECT WORD
(To'g'ri so'zni belgilang)





1. This is (our/ours) car.
2. Is this (yours/your) house?
3. Whose is this umbrella? It's (my/ mine).
4. That bicycle is (hers/her).
5. She's (mine/my) sister. (Her/Hers) name is Umida.
6. That is (me/my) friend Sitora.
7. Bekzod this is Bahora. (She/Her) is a doctor.
8. Is this your wallet? No it is not (my/mine). It's O'gloy's.

Gulzoda NAFASOVA,
Samarqand viloyati, Pastdarg'om tumanidagi
24-umumta'lim maktabining 9-«B» sinf o'quvchisi

THE RESOURCEFUL GAME
(Topqirlik o'yini)

Resolve the following rebus.

Find the names of these things in English and put together the head letters to make a new word.



Risolat ISMOILOVA

DO YOU KNOW THIS?
(Bilasizmi?)

Vitamins are found in four food groups: 1) Fish and meat. 2) Vegetables and fruits. 3) Eggs and milk products. 4) Grains.

Doctors' advise that the best way to get all the vitamins we need is to eat some of these foods every day.

PUNCTUATION
(Tinish belgilari)

The parrot needs help putting the correct punctuation at the end of each sentence. Help him complete each sentence by adding a period (.), exclamation point (!) or question mark (?).

1. Who is the author of the story you have just read _____
2. The story is about modern computers _____
3. Don't open the window _____
4. Did you learn by heart the poem yesterday _____
5. Sardor and me are close friends _____
6. Look at those black clouds on the sky _____
7. Could you swim when you were at 8 _____
8. Where do you go every day _____



Dinora SHAKIROVA tayyorladi

She'riyatning nurli bo'stoni

Yozgan she'rlarining ohangidan quvonchi olamga sig'magan ijodkor yoshlarning dilonmalarini ko'zdan kechirib, kutilmaganda yarq etib kishini o'ziga mahliyo etgan quvnoq satrlarning guvohi bo'lamiz. Sehrli so'z dunyosida baxtli bolalik zavqini surib, mashq qilayotgan o'quvchilarimizga she'riyatning beg'ubor bo'stoniga qo'ygan qadamingiz qutlug' bo'lsin, deymiz. Bugungi she'riyat bahsida o'zingiz goh ilg'ab, gohida ilg'amay qog'ozga tushirgan nuri satrlaringiz haqida o'rtoqlashaylik.

Gulbahor

Gulbahor, hoy gulbahor,
Quchog'ingda shodlik bor.
Ko'z tegmasin husningga,
Tugamaydi hech alyor.

Suv bo'yida sumbulcha,
Boychechak – ajib gulcha.
Yurtga atab she'r yozdim,
O'zim – mitti bulbulcha.

Halima OTABEKOVA,
Xorazm viloyati,
Hazorasp tumanidagi
36-umumta'lim maktabining
6-sinf o'quvchisi

Kitob

Kitob mening hamrohim,
Turar doim yonimda.
Undan olaman boylik,
Gap ko'p qadrdonimda.

Shahzoda FAZLIDDINOVA,
Surxondaryo viloyati,
Sariosiyo tumanidagi
3-umumta'lim maktabining
7-sinf o'quvchisi

ERKATOY

Erkatoyson juda ham,
O'n yosh bo'lding bugun san.
Sovg'alarim oz, deysan,
Hayron qoldim hatto man.

Dilfuza MAHMUDOVA,
Farg'ona viloyati,
O'zbekiston tumanidagi
16-umumta'lim maktabining
6-sinf o'quvchisi

ERTAK

Mo'jizalar yurtida,
Qanot bog'lab uchaman.
Tarab oftob sochini,
Keng osmonni quchaman.

Asalxon OTAXONOVA,
Hazorasp tumanidagi
47-umumta'lim
maktabining 8-sinf
o'quvchisi

VATAN

Yo'llarimda baxt-ziyo,
Ota-onam duosi.
Ko'zlarimga to'tiyo,
Vatanning hur siy mosi.

Dilnozaxon KAMALOVA,
Qoraqalpog'iston
Respublikasi, To'rtko'l
shahridagi 11-umumta'lim
maktabining 7-sinf o'quvchisi

Keksalar

Har doim quvnatgim kelar dilini,
Ulardan o'rgandim hayot ilmini.
Tuhfalar qilaman mehrim gulini,
Ona yurtim keksalari e'zozda!

Gulnora AHMEDOVA,
Pitnak shahridagi 4-umumta'lim
maktabining 8-sinf o'quvchisi

YURT MADHI

Quchog'ingda ulg'ayib o'sdim,
Bog'laringda sho'x-shodon kezib.
Tuproq'ingni mudom madh etgum,
Oltinga kon ekanin sezib.

Lutfiya JO'RAYEVA,
Qashqadaryo viloyati,
Yakkabog' tumanidagi
44-umumta'lim maktabining
9-sinf o'quvchisi

TIPRATIKAN

Tipratikan topvoldik,
Bog'imizdan bir kuni.
Ko'zlari misil munchoq,
Tikanli ekan to'ni.

Uychada yolg'iz o'zi,
Yotgan ekan bekinib.
Sadoqat cho'chib tushdi,
Qo'li unga teginib.

Kumushbibi RAHMONOVA,
Samarqand viloyati,
Pastdarg'om tumanidagi
44-umumta'lim maktabining
8-sinf o'quvchisi



Chindan ham bugungi sahifamizda keltirilgan qisqa, ammo o'quvchiga zavq beradigan rangin satrlarni o'qib siz ham ilhom olgan bo'lsangiz, ajabmas. Sevimli shoirimiz Erkin Vohidov bekorga, she'rning zo'ri to'rt satr, deya yozmagan. She'r hajmi bilan emas, balki o'quvchi qalbida chuqur iz qoldirishi bilan ahamiyatlidir.

Siz yuborgan she'riy maktublardan saralab, qog'ozga tushirgan satrlarimiz guldastasi ko'nglingizni xushnud etgan bo'lsa, bundan keyin, albatta, «Yetti o'lchab, bir kes» maqoligam amal qilgan holda so'zlar ustida yanada ko'proq ishlab va bizga yubormoqchi bo'lgan har bir maktubga jiddiy yondashasiz, degan umiddamiz!

AXTAMQULI

Rasul bilan Jalil maktabdan qaytgach, Rasulamkida uyga berilgan vazifalarni birgalikda tayyorlamoqchi bo'lishdi. Hammasidan ham fizikadan berilgan masalalar ularga rosa qiyinchilik tug'dirdi. Shunda Rasul Jalilga:

– Uyga borgach, masalalarni yana bir marta tekshirib ko'r, ayrimlarida xatoliklar bo'lishi mumkin. Men esa senga hozir bog'imizdagi olmalardan olib kelaman, – deya xonadan chiqib ketdi.

Shunda Jalilning xayolidan:

– Baribir Rasul yechgan masalalar to'g'ri chiqadi. Agar uning daftarini olib qo'ysam, ertaga bir o'zim a'lo baho olar edim. U ham bir marta yomon baho olib ko'rsin, – degan fikr o'tdi va do'stining daftarini papkasiga solib qo'ydi.

Shu payt quchog'ini olmalar bilan to'ldirib Rasul kirib keldi.

– Ha, keldingmi, buncha hayallading? – dedi Jalil.

– Olmalar terib keldim, mana, ol.

– Rahmat, endi men boraqolay.

Shunday deb Jalil do'sti bilan xayrlashdi. Ko'chaga chiqqanida o'zida yo'q xursand edi. Go'yoki ertaga fizikadan bir emas, ikkita besh oladigandek.

Ko'chada futbol o'ynayotgan bolalarni ko'rib, Jalilning ham koptok tepgisi keldi. Papkasini o'tloqqa uloqtirib, ularga qo'shildi.

VAZIFA



SH. MAMAJONOVA chizgan rasmi

Maydon chetida kichkina bolalar o'yinni tomosha qilib o'tirishgan edi. Ulardan biri yerda sochilib yotgan kitob-daftarlarga hayron bo'lib qaradi. Shu payt ko'zi o'rtacha qalinlikdagi daftarga tushdi.

Qodirov Rasulning fizika daftarini...

– Axir bu Rasul akamning daftarini-ku. Hoziroq ularga olib borib beraman, – deya bola qo'shni akasining hovlisiga yugurdi.

Ertasiga Rasul va Jalil birgalikda maktabga kelishdi. Birinchi soat fizika darsi edi. Har doimgidek ustoz mavzu bilan tanishtirgach, uy vazifalarini tekshira boshladi:

– Azizov, daftaring bilan kel, – deb chaqirdi u. Jalil gerdaygancha o'qituvchiga daftarini uzatdi. Ustoz masalalarga ko'z yugurtirgach:

– Azizov, xatolaringni ko'rmadingmi? Yoki mavzuni yaxshi tushunmaganmiding? Yechgan masalalaringda xato borligi uchun bahoing «3» bo'ldi.

Jalil go'yoki osmondan «gurs» etib yerga tushganday bo'ldi. Shu mahal Rasul ham doskaga chaqirildi. Shunda Jalil beixtiyor:

– Uning daftarini yo'q, ustoz, demak, uy ishi ham yo'q, – deb yuborganini o'zi ham sezmay qoldi.

– Daftarim mana, ustoz, – deya Rasul qo'lidagini o'qituvchiga uzatarkan, do'stining gapini eshitmaganga oldi.

O'qituvchisi Rasulning masalalarini tekshirib, xursand bo'ldi.

– Barakalla, masalalarni to'g'ri yechibsan. Bahoing «5».

Qilgan ishidan pushaymon bo'lgan Jalil uyalganidan yer chizib qoldi.

Shahnoza MUHAMMEDOVA

G'OLIBLIKNI BOY BERMAGANLAR

Samarqand viloyatining Jomboy tumanidagi 7-umumta'lim maktabida sport to'garaklari faollari talaygina.

7-«B» sinf o'quvchilaridan Diyorjon Ergashev hamda Diyor Musulmonov sportning kombat-aykido turi nagdaun yo'nalishi talaygina.

bo'yicha tuman, viloyat musobaqalarida g'oliblikni qo'ldan bermay kelishmoqda. Xalqaro kombat-aykido assotsiatsiyasi Navoiy viloyatida Amir Temur tavalludiga bag'ishlab tashkil-lashtirgan sport musobaqasida Diyorjon 1-, Diyor esa 2-o'rinni egalladi.

Shoira SHUKUROVA

Mashhur sinf sardori

Mashhurbek Arslonov Andijon shahridagi 30-umumta'lim maktabining 5-sinfida ta'lim oladi. Besh yildan buyon sinf sardori vazifasini mas'uliyat bilan bajarib kelmoqda. «Yosh matematik» va «Ingliz tilini o'rganamiz» to'garaklari a'zosi. Muassasa qoshidagi drama teatri tomoshalarida faol ishtirok etadi.

Mana, to'rt yildirki, viloyat hokimligi Madaniyat va sport ishlari boshqarmasiga qarashli ixtisoslashtirilgan Olimpiya zaxiralari bolalar va o'smirlar sport maktabida u erkin kurash bilan shug'ullanib keladi. Yosh sportchi xalqaro turnirlar sovrindori, viloyat terma jamoasi a'zosi Anvarbek Sanayev murabbiyligida ko'plab musobaqalarda ishtirok etib, ustozlari ishonchini oqlamoqda.

O'tgan yillar davomida Andijon viloyati chempionati hamda 1998 – 2001-yilda tug'ilgan o'smirlar o'rtasidagi ochiq turnirda faxrli 2-o'rinni egalladi.

Kurashchi hozirda joriy yilning may oyida Toshkent shahrida bo'lib o'tadigan bolalar va o'smirlar o'rtasidagi O'zbekiston chempionatiga puxta tayyorgarlik ko'rmoqda.

– Mashhurbek sabab, sinfimiz shaharda mashhur bo'ldi.

O'quvchining kelajakda jahon miqosidagi musobaqalarda, Olimpiada o'yinlarida g'oliblikni qo'lga kiritib, O'zbekistonimiz bayrog'ini yuqoriga ko'tarishiga ishonaman, – deydi ustoz Barnoxon Mavlonova.

Andijonlik o'quvchining kelgusida nafaqat maktabi, balki mamlakatimiz sharafini munosib himoya qiladigan yetuk sportchi bo'lishiga biz ham ishonamiz.

NURBEK

H. HAMIDULLAYEV o'lgan surat

Bektemir – jahon chempioni

Bektemir 2005-yildan beri boks bilan muntazam shug'ullanib keladi. Chapdast va epchil sportchi betakror harakatlari bilan mutaxassislar e'tiboriga tushdi. O'tgan yillar davomida yuksak unvonlarga sazovor bo'ldi. Bir necha marta O'zbekiston chempioni bo'lgan charm qo'lqop ustasi Ozarbayjonda o'tkazilgan xotira, Rossiya Federatsiyasining Anapa shahrida bo'lib o'tgan xalqaro, Qozog'iston Respublikasi, Almati shahri, Mingerey Xayriddinov xotirasiga bag'ishlangan turnirda g'oliblikni qo'lga kiritdi.

Yosh bokschi birgina o'tgan yilning o'zida qator g'alabalar sohibi bo'ldi. Jumladan, Tailandda o'smirlar o'rtasidagi Osiyo chempionati g'olibi, Bolgariya poytaxti Sofiya shahridagi jahon chempionati sovrindori hamda XXR Nankin shahrida bo'lib o'tgan o'smirlar o'rtasidagi 2-Olimpiada o'yinlarida chempionlikni qo'lga kiritdi. Shuningdek, Namanganda o'tkazilgan «Barkamol avlod» sport o'yinlari g'olibi bo'ldi.

Ismi jismiga monand sportchimiz vaqti kelib, murabbiy sifatida respublikamizdagi boksga uquvi bor yoshlarni kashf etib, yurtimizda sportning bu turi ommalashishiga hissasini qo'shishni oldiga asosiy maqsad qilib olgan.

Xurshid YUNUSOV

Iqbolingiz ko'rib, quvondim

viloyat miqosidagi musobaqalarda qatnashishining o'zi katta bir orzu edi. O'quvchilarning xalqaro musobaqalardagi ishtiroki haqida esa gapirmasa ham bo'ladi...

Bugun hammasi boshqacha. Davlatimiz tomonidan sportni rivojlantirish, yoshlarimizni bu sohaga kengroq jalb etish borasida olib borilayotgan keng ko'lami ishlarni ko'rib, bugungi shukuhli kunlarimizga shukronalar aytaman.

Sattor boboning so'zлари ayni haqiqat. Hozirda ommaviy axborot vositalari orqali biror o'smiring qaysidir xalqaro musobaqada g'olib bo'lgani to'g'risida xushxabar eshitmagan kunimiz yo'q. To'maris avlodlari

bo'lmish sportchi qizlarimizning ham bugun g'ayrat-shijoati o'zgacha. Yigitlardan qolishmagan holda ular ham turli musobaqalarda ketma-ket g'oliblikni qo'lga kiritishmoqda.

O'zbekiston bolalar sportini rivojlantirish jamg'armasi Jizzax viloyati filiali direktori O'ktam Mamatqulovning ta'kidlashicha, 2003-yildan hozirgi kunga qadar viloyatda jamg'arma tomonidan 105 ta yangi bolalar sport inshootlari qurilib, mavjudlari rekonstruksiya qilindi.

– Misol uchun, ayni kunlarda viloyatimizning Baxmal, Jizzax, Zomin, G'allaorol, Zarbdor tumanlari umumta'lim muassasalarida 12x24 o'lchamdagi sport zallari qurilib,

foydalanishga topshirildi, – deya qo'shimcha qildi O'ktam aka. – Shuningdek, Jizzax shahrida Universal sport majmuasi, Zomin tumanidagi 1-bolalar va o'smirlar sport maktabida yopiq suv havzasi barpo etildi.

Ayni kunda sportga mehri baland yoshlar uchun barcha sharoitlar muhayyo. Gap esa bu imkoniyatlardan oqilona foydalanishda. Biz bu borada siz, aziz sportsevar do'stlarimizga ishonamiz.

Farhod ESHMO'MINOV

Bilimdonlar bellashgan zamon, Nurga to'lar hur O'zbekiston!

Toshkent davlat sharqshunoslik instituti qoshidagi Olmazor akademik litseyida ta'lim ikki yo'nalishda: xorijiy filologiya hamda aniq fanlar bo'yicha olib boriladi. Litseyda 5 ta kafedra faoliyat ko'rsatadi. Jumladan, aniq fanlar kafedrasida 9 nafar o'qituvchi matematika, fizika, astronomiya, kimyo, biologiya va iqtisod asoslari fanlaridan dars berishmoqda. Iqtidorli o'quvchilar bilan ishlash maqsadida kafedralarda «Yosh matematiklar», «Yosh fiziklar», «Yosh kimyogarlar» to'garaklari faoliyati yo'lga qo'yilgan.

Maskanda har yili aprel oyida aniq fanlar oyiligi o'tkazilishi yaxshi an'anaga aylangan bo'lib, bunda barcha o'qituvchilar ochiq darslar va ma'naviy-ma'rifiy tadbirlar tashkil-tashirishadi.

Yaqinda bo'lib o'tgan «Quvnoqlar va zukkolar» bellashuvida ta'lim muassasasining 1-bosqich o'quvchilaridan tuzilgan «Erudit», «Tezlik», «Haqiqat», «Bilimdonlar» guruhleri o'zaro bellashishdi. «Tashrif», «Kashfiyotlar olami», «Qonunlar bekati», «O'yla, izla, top», «Fizika – hayotda», «Zukkolar oroli» hamda «Shakl ichida shakl» shartlari yuzasidan olib borilgan tanlovda o'quvchilar darsda o'zlashtirgan bilimlari yuzasidan kuch sinashdilar. Bilimdon zukkolar dunyo



olimlarining fanda yaratgan ixtirolarini slaydlar orqali namoyish etishdi. Qonunlarni sharhlashdi. Ayniqsa, Muhammadali Karimov, Ziyoda Erkinova hamda Muxlisa Nabiyevaning «Yonmaydigan ro'molcha», «Shisha idish va tuxum» amaliy tajribasi qatnashchilarda katta taassurot qoldirdi.


Bahs va munozaraga boy bellashuv o'z nihoyasiga yetdi. Hay'at a'zolari tomonidan o'quvchilarning har bir chiqishlari munosib baholandi. 5-14 guruh, «Tezlik» jamoasi 1-, 1-14 guruh «Erudit» jamoasi 2-, 6-14 guruh, «Haqiqat» chilarga 3-o'rin nasib etdi.

Dilbar IBODOVA,
Muborak
TOSHMETOVA,
TDSHI qoshidagi
Olmazor akademik
litseyi o'qituvchilari,
NURBEK



BO'SH O'TIRMAI, BOSH QOTIR!

«SAYOH TOSHBAQA» KROSSVORDI



Bo'yiga: 1. Nodira taxallusi. 2. Qit'a. 3. Ho'l. 5. Hasharot. 7. Olim. 9. Muammo. 13. Yozuv quroli. 16. Ovoz. 18. ... – bula.
Eniga: 4. Monand. 6. Xonadon. 8. Dunyo. 10. Sira. 11. Farishta. 12. Bahodir. 14. Tong. 15. Shohning qizi. 17. Chap. 19. Ota (shevada).

Tuzuvchi: Fayzulla ABDULLAYEV



Bu, qiziq!

Sarlavhani o'qib, hayron bo'lyapsizmi? Ha, bu rost gap. Amerika Qo'shma Shtatlarining Viskonsin shtatida yashovchi Mari Xant ismli buvijonning bir umrlik orzusi oxiri ushalibdi.

103 YOSHLI O'QUVCHI!

Yoshligida uka va singillari tarbiyasi bilan mashg'ul bo'lib, vaqtida o'qiy olmagan bu xonim, nihoyat o'rta maktabni bitirib, yetuklik shahodatnomasini oldi. O'zini juda sog'lom va tetik his qilayotgan momomizning endigi orzusi – kollejda tahsilni davom ettirish. Shuni aytishadi, «Ilm olish yosh tanlamaydi», deb.

BONU tayyorladi



8

27-aprel 2015



Bosh muharrir
Feruza ADILOVA

Tahrir hay'ati:
Omonulla YUNUSOV,
Abdug'ani XOLBEKOV,
Bahodir G'ANIYEV,
Svetlana INOMOVA,
Murtazo SULTONOV,
Zoir ISAJONOV,
Vahobjon RAJAPOV,
Zikrilla TESHABOYEV,
Feruza JALILOVA,
Feruza MATYOQUBOV
(mas'ul kotib)

Navbatchi
muharrir
Axtamqul
KARIMOV
Rassom
Feruzbek
KAMOL o'g'li

Manzirimiz:
Toshkent shahri,
Navoiy ko'chasi, 30-uy.
Indeks: 100129.
Obuna indeksi: 198.
e-mail:
info@tongyulduzi.uz
www.tongyulduzi.uz

Tel./faks: 244-63-08
Tel./faks:
(99871) 244-38-10

«O'zbekiston»
NMIUda chop etildi.
Tahririyatga kelgan barcha
qo'lyozmalar tahrir qilinadi,
mualliflarga qaytarilmaydi.
Haftaning dushanba kuni
chiqadi.
Shakli A-3, 2 bosma taboq.
ISSN 2010-6092
Adadi – 48215
Buyurtma – S 2761

Muassislar:

O'zbekiston Matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOL» yoshlar ijtimoiy harakati
Markaziy Kengashi,
«SOC'LUM AVLOD UCHUN» hukumatga
qarashli bo'lmagan xalqaro xayriya fondi.

Gazeta O'zbekiston Matbuot
va axborot agentligida
0208-raqam bilan 2007-yil
2-fevralda ro'yxatdan o'tgan.